

**Utoqqalinermi pensionisiat pillugit Inatsisartut aalajangiiffisassaattut  
siunnersuut**

**pillugu**

**Inatsisartut Ilaqutariinnermut Ataatsimiititaliaata**

**ILASSUTITUT ISUMALIUTISSIISUTAA**

**Siunnersuutip aappassaaneerneqarnerani saqqummiunneqartoq**

Inatsisartut Ilaqutariinnermut Ataatsimiititaliaat suliarinninnermini ukuninnga inuttaqarpoq:

Inatsisartunut ilaasortaq Olga P. Berthelsen, Inuit Ataqtigiit (siulittaasoq)  
Inatsisartunut ilaasortaq Emilie Olsen, Atassut (siulittaasup tullia)  
Inatsisartunut ilaasortaq Agnethe Davidsen, Siumut  
Inatsisartunut ilaasortaq Ruth Heilmann, Siumut  
Inatsisartunut ilaasortaq Astrid Fleischer Rex, Demokraatit

Naalackersuisut allannguutissatut siunnersuutaat Ilaqutariinnermut  
Ataatsimiititaliamit sukumiilluinnartumik misissorneqarpoq.

**Allannguutissatut siunnersuummut oqaaseqaatit**

Ilaqutariinnermut Ataatsimiititaliap kaammattuineratigut allannguutissatut  
siunnersuummik ima nassataqartumik Naalackersuisut allannguutissatut  
siunnersuummik saqqummiussimmata Ilaqutariinnermut Ataatsimiititaliamit  
iluarisimaarneqarpoq:

- Tapit aningaasanut atugassiissutininut tunngasutut taallugit - immikkut  
tapiissutinik aalajangersaasinnaanermik kommunit periarfissinneqarnerat.

Tapit aningaasanut atugassiissutininut tunngasut taakkulu naatsorsorneqartarnerat  
pillugit erseqqinnerusunik maleruagassiornissamut Naalackersuisut allannguutissatut  
siunnersuutikkut aammattaaq piginnaatinneqarput. Erseqqinnerusunik  
maleruagassiornissamut Naalackersuisunut piginnaatitsissutip kommunit tapinik  
aningaasanut atugassiissutininut tunngasunik tunniussinissamut periarfissaannut

ajornerulersitsissanngitsoq Ilaqutariinnermut Ataatsimiititaliamit erseqqissarneqassaaq. Ilaqutariinnermut Ataatsimiititaliap paasinninnera malillugu kommuninit tapiissutit aningaasanut atugassiissutininut tunngasut tassaapput utoqqalinermi pensionisialinnut aningaasatigut atugassiissutissatut kommuninit aalajangersarneqartussatut.

Allannguutissatut siunnersuummi § 01, imm. 3-mi piginnaatitsissut kommunit akornanni utoqqalinermi pensionisiallit atugaasa sanilliussissutiginnissaanni tunngavissaasinnaavoq pingaarutilik, tamannalu utoqqalinermi pensionisiallit atugaat pillugit iliuusissanik aalajangersimasunik pitsanngorsaataasussanik Inatsisartut Naalakkersuisullu ingerlaavartumik saqqummiussisinnanannut periarfissiivoq.

Aanigaasanik aalajangersimasunik atugassiissutinik kommunit atuisarnerat pillugu Inatsisartut Ombudsmandiata siusinnerusukkut uparuaanera Naalakkersuisut allannguutissatut siunnersuutaatigut malinneqarpoq.

### **Allannguutissatut siunnersuutip kingunerisassai**

Allannguutissatut siunnersuummik ilusiliisimaneq naapertorlugu tapinik aningaasanut atugassiissutininut tunngasunik kommuni tunniussissanersoq kommunit nammineerluinnarlutik qinigassaraat.

Taamattorli Naalakkersuisut pensionisiaqarnermut siunnersuutigeqqaagaat inummut tapinik kommunit tunniussinissamut periarfissaasa killilerneqarneratigut ilaannakuusumik aningaasalorsorneqartoq paasineqarpoq. Tamanna aappassaaneerinninnissamut Naalakkersuisut akissuteqaataanni Naalakkersuisullu inatsisissatut allannguutissatut siunnersuutaannut inatsimmut nassuiaatini erseqqissumik takuneqarsinnaavoq.

Pensionisiat aaqqiissuteqqinneqarnerani kommunit aningaasartuuteqarnerunermut taarsiivigineqarnissaat, kommunilli isertitaqarnerussutaat sipaarutaallu Namminersornerullutik Oqartussat kommuninut ataatsimoortumik tapiissutaanni ilanngaatigineqartassasut aningaasaqarnikkut kingunerisassat naatsorsorneqarneranni taamaalilluni naatsorsuutigineqarpoq.

Naalakkersuisut allannguutissatut siunnersuutaat Ilaqutariinnermut Ataatsimiititaliap kaammattuuteqarneratigut saqqumiunneqartup tapit aningaasanut atugassiissutininut tunngasut tunngavigalugit tapiissuteqartarnermut periaatsiminnik ingerlatitsiinnarnissamut kommunip periarfissippai. Taamaattumik Namminersornerullutik Oqartussat kommuninut ataatsimoortumik tapiissutaanni ilanngaatigineqarsinnaasunik tapini taakkunani sipaaruteqartoqassanngilaq.

Aningaasanut Nunanullu Allanut Naalakkersuisoq ataatsimiititaliamut makkuninnga paasissutissiivoq:

Inuttut tapinut sipaarutit atorunnaarpata Namminersornerullutik Oqartussat 2007-imi aningaasartuutaat 5 mio. kr.-inik qaffassapput, taakku 2007-imut Aningaasanut inatsimmi sillimmatinut immikkoortinneqartunut naapertuupput. Namminersornerullutik Oqartussat 2007-imi aningaasartuutaat taamaalillutik

sillimmatit immikkoortinneqartut iluini akilerneqarsinnaanissaat naatsorsuutigineqarpoq. Taamaattorli naatsorsuinernut atatillugu nalornissuteqaroqarpoq, apeqqullu KANUKOKA-mik isumaqatigiinniutigineqassaaq. Kiisalu pensionisianut sillimmatinit kommuninut ataatsimoortumik tapiissutinut nuussineq Aningaasaqarnermut Ataatsimiititaliamit akuersissutigineqassaaq.

Inuttut tapinut sipaarutit atorunnaarnerisa kingunerisaanik 2008-mit siumullu 2007-imut Aningaasanut inatsisissatut Siunnersuummi pensionisianut sillimmatit immikkoortinneqartut ukiumoortumik 10 mio. Kr.-inik akitsuut matussusersinnaangilaat.

**KANUKOKA-mik qaninnerusumik suleqateqarnissamik pisariaqartitsineq**

Alanguutissatut siunnersuummi § 01. imm. 3-mi piginnaatitsissummik Naalakkersuisut atuinalersaassappata Naalakkersuisut KANUKOKA-mik isumasioqateqassasut Ilaqutariinnermut Ataatsimiititaliaq isumaqarpoq. Tamanna tusarniaanissamut nalinginnaasumik pisussaaffimmut ilassutitut pisussaaffimmut ilaatinneqassasoq ataatsimiititaliap kissaatigaa.

Ilaqutariinnermut Naalakkersuisoqarfiup KANUKOKA-llu akornanni qanimut oqaloqatigiittarneq pisariaqartoq Ilaqutariinnermut Ataatsimiititaliaq isumaqarpoq, taamaalilluni siunnersuutip kingunerisinnaasai naatsorsuutigineqariinngitsut naapertuutinngitsullu sapinngisamik piaartumik qanimullu suleqatigiinnikkut sulissutigineqarsinnaaqullugit.

**Inassuteqaat**

Siuliani allassimasutut siunnersuummik, taassumalu aningaasatigut kingunerisassaanik paasinnilluni allanguutissatut siunnersuutip maanna ilusimisut iluseqartup akuersissutigineqarnissaa Ilaqutariinnermut Ataatsimiititaliap inassutigaa.

Olga P. Berthelsen  
Siulittaasoq

Emilie Olsen

Agnethe Davidsen

Ruth Heilmann

Astrid Fleischer Rex